

31. oktober

UKA2018/150

**Qanoq ililluta nunatta iluani timersornikkut pitsanngorsaallutalu ineriartortitseqqissinnaavugut? Nunatta nunanut allanut unammisartoqarnerup tungaatigut inerisaajumalluta, timersoqatigiiffiit nunatsinni pissartanngorniuuttarnerit avataatigut, nunatta iluani unammisaqattaartarnerat akulikinnerulersinneqassappata taava qanoq iliuseqartariaqarpugut? Apeqquteqaat aallaavigalugu oqallinnissamik siunnersuut.**

Inuit Ataqatigiit sinnerlugit Inatsisartuni ilaasortaq Peter Olsen oqallisissatut siunnersuutaa Siumumiik imaattumik oqaaseqarfigissavarput.

Timersorneq tassaavoq pinaveersaartitsinermi sakkussatta pitsaanersaat tassami ilisimatuussutsikkut misissuinerne uppersaartissaqarluareerpoq iluaqutaasorujussuusoq. Misilittakkat takutittarpaat aangajaarniutunik atornerluineq annertuumik timersorneq aqputigalugu pinaveersaartinneqartartoq. 2014-imi innuttaasut peqqissusaannik misissuinerne takutinneqarpoq innuttaasut puallaraluttuinnartut, kingunerisaanik nappaatit assigiinngitsut atugaanerat aamma annertusigaluttuinnarpoq. Misissuinermittaaq takutinneqarpoq nunatsinni pujortartartut innuttaasut affai sinnerlugit amerlassuseqartut soorluttaaq ikiaroomartup atugaanera angutini inuusuttunilu qaffakkaluttuinnartoq, aammattaaq imigassamik atuinerput ilaqutariippassuarnut innuttaasunullu tamanut annertuumik eqquisarpoq. Taamaammat timersorneq siuarsartuassallugu pissutissaqarluarpugut.

Innuttaasut nammineq piumassutsimik peqatigiiffinni kattuffinnilu suliaqartut ikiliartuinnarput tamassuma kingunerivaa kattuffiit siornatigut ingerlalluarsimasut unittooraluttuinarnerat, taamaammat nammineq piumassutsimik suliaqarneq annertuumik nukittorseqqinneqartariaqarpoq. Timersornermut piumassuseq siuarsassagaanni meeraaqat mikineranniilli tapersorsorlugit timiminnik atuisinnaanerat siuarsagassavoq, taamaammat meeqqeriviit kommunillu suleqatigalugit siuarsaanissaq pisariaqarpoq. Assersuutigalugu nunatsinni meeqqeriviit ilai siunertaqarlutik ullut tamaasa meeqqanik pisuttuartsisarput, qummukajaakkut pisutsillugit niui nukittorserlugit tamakku aallarniutaapput meeqqanut pitsaasut.

Siumup anguniagaannut ilaavoq kommunit qanimut suleqatigalugit timersornerup siuarsarneqarnissaa. Tamanna tunngavigalugu kommunini borgmesterit siornatigut atsioqatigineqarnikuupput (hensigterklæring) meeqqat atuarfiini timersorneq siuarsarneqassasoq tassa minnerpaamik ullormut akunneq ataaseq timiminnik aalatinneqartassasut, vikaareqartillutik filmertinneqaannaratik timersortinneqartassasut kiisalu sunngiffimmi angajoqqaat pissakitsuugaluarpataluunniit meeqqat tamarmik timersorsinnaanissaat aqputissiuunneqassasoq. Ullumikkut susasaqartitsinermik sammisaqartunut Naalakkersuisuni pulje a, b, c-mut tipsinut sinneqartoorutinit aningaasanik agguassisoqartarpoq, taakkunani aningaasat amerlanerpaat Timersoqatigiit Kattuffiannut tunniunneqartarput.

Pan Am Nuummi ingerlanneqarmat innuttaasunut annertuumik eqjiallatsitsivoq nukissamik piumassusermillu tunisilluni. Aaqqissuussat taamaattut siunissami amerligaluttuinnassasut qularnannigilaq tamakkulu annerusumik aningaasaqarnikkut sillimaffigisariaqarpagut. Aaqqissuussat

taama annertutigisut timersornikkuinnaanngitsoq nunattali nittarsaanneqarneranut, soqutigineqarneranut, takornariaqarnikkut niuernikkullu annertuumik iluaqutaasinnaapput. Ataatsimut oqaatigalugu timersornikkut siuarsagassarpassuaqarpugut, soorlu sungiusaasoqarnikkut, timersortarfeqarnikkut allarpassuartigullu. Siumumiilli isumaqarpugut nunaqarfiit timersortarfeqanngitsut pingaartinneqarlutik inerisaavigineqartariaqartut. Timersoqatigiit Kattuffiat Naalakkersuisunik qanimut suleqatigineqartutut oqaatigineqarsinnaavoq, tassami anguniagassanik isumaqatigiissusiortoqartarpoq. Timersoqatigiit kattuffiat isumasioqatigiinnernik sinerissami ingerlatsivoq soorluttaaq Nuummi aamma taamatut isumasioqatigiittoqassasoq. Kattuffik tassaavoq nunatsinni timersornikkut pisariaqartitanik ilisimasaqarnerpaaq isumaqatiginninniarnerrillu kattuffik aqqutigalugu ingerlanneqartariaqartutut Siumumi isumaqarpugut. Oqallissaaraluni saqqummiussaqaqtup qulequtsiilluni apeqqtigisai, tunngaviusumik pitsaasumik siunertallit Siumumiik paasisinnaalluarpagut. Siunnersuuteqassagaannili aningaasanik aallerfissanik tikkuussinissaq pisariaqarluinnarpoq aningaasanullu inatsisissap suliarineqarnerani akisussaaqataalluni peqataanissaq soorluttaaq pingaaruteqartoq.

Doris Jakobsen Jensen